

E hermandad entre Aruba Marriott Resort, Fundacion Juan Mario Odoor (museonan) y Fundacion Movimento di Arte Nobo Aruba (MANA) ta na fabor di Aruba en general

“Waak e profundidad den nos actividadnan”

STA. CRUZ -- Casi un año despues cu Museo Numismatico Aruba a sinti falta di expresionnan cultural den diferente sector turistico, a bin cu un iniciativa pa haci introduccion di cultura den area caminda nos bishitantenan ta hospeda. Museo Numismatico Aruba y Museo Antigüedad Aruba ta museonan hopi clave pa educacion basico riba cultura di Aruba. Museonan merece tur aprecio di pueblo di Aruba pasobra nan ta warda y conserva historia, cultura y idioma di Aruba. Asina mes no tin e cantidad di bishita local cu nan ta desea. Ora comunidad no duna interes na e museonan esaki sigur lo bay atras pa falta di atencion. Pa haya atencion museonan ta haci uso di diferente metodonan por ehempel exposicion y lectura pa muestra con importante nan trabao ta pa nan pais. Museonan ta trata na impresionar su pueblo y pone na altura di

cuanto e lo por promociona su mes ora muestra su cara cultural y artistico pa medio di exposicionnan y coleccionnan di Antique, Placa y Arte. Poco poco museonan ta purba promociona nan mes y atrae mas hopi bishitante cu ta posibel. Ideal ta pa logra cu comunidad ta cuminza carga e responsabilidad pa su museonan cu ta encera nan propio identidad, den forma di bishita y contribucion riba diferente manera. Igualmente museonan a sinti falta di bishita di nos turistanan pa hopi tempo, cual riba su mes no tabata nada straño. Pasobra si nos mes no duna nos museonan balor, door di por ehempel sa unda nan ta keda ora cu turista puntra direccion, anto ta logico cu poco informacion clave tabata ser duna na nos turismo riba nos cultura y nos tradicionnan. Ta den museonan nos bishitantenan y nos mes por haya e informacion di nos hendenan (identidad)

y nos historia. Esaki ta motibo pakico Museo Numismatico Aruba den nomber di Fundacion Juan Mario Odoor a cuminza acerca hotel pa puntra si nan tin interes pa hunto cuminza moviliza riba e tereno cultural.

Aruba Marriott Resort a acepta e reto pa crea actividadnan cultural pa nan bishitantenan. Pa resalta nos cultura den sector turistico no ta nada facil pasobra e actividadnan cultural di Aruba ta cortico (un dia, cu excepcion di carnaval) y e turista no ta haya chens di conoce esakinan. Esaki ta motibo principal cu a bin cu e idea pa laga nos turismo cera conoci cu mucho mas di Aruba a travez di ARTE. Conhuntamente nos a celebra Dera Gai, Dande y Carnaval. Awor ta toca turno pa muestra mas aspecto di nos isla y nos ta trece un exposicion magnifico y colorido di FLORA. Den mente e organizadornan kier sigui muestra Aruba en

general y nos bishitantenan con importante nos naturaleza tambe ta pa promove nos isla como un destinacion turistico. Di otro banda esaki tambe ta yuda crea conseshi pa preserva nos matanan, nos flora. Actividadnan cu ta trece hopi aspecto dilanti cu ta importante pa nos isla ta prioridad pa Fundacion Juan Mario Odoor, conservacion di cultura, historia, idioma y hasta naturaleza ta educacion basico pa nos pueblo y muestra bishitantenan cu nos ta preocupa cu nos isla, cu nos tin nos isla na pecho y nos ta orguyoso di dje.

Nos NO ta e imagen materialistico cu medianan a crea door di expresa cu Aruba ta interesa solamente den e placa di e turista y ta pensa solamente den crecimiento economico, nos pueblo tin mas profundidad cu esey. Creando un esfera di stimacion profundo pa bo pais, bo no ta tira sushi

afo den mondi pa sofoca y dorna tur nos matanan cu saco di plastic, motibo pakico kisas hopi ni sikiera lo haya chens di muestra nan bunita flor.

Diarazon 24 di Mei proximo varios artista lo expresa con bunita nos FLORA ta. Artistanan renombra ta uni forza pa papia den nomber di nos naturaleza, nan nomber ta: **Maria Teresa Wever-Martinez, Frank Croes, Edmond Tuyeehut, Elvis Tromp, Mo Mohamed, Alfonso De Windt, Belinda De Veer, Adolfo Valbuena, Stan Kuiperi, Laureen Eman, Maria La Torre, Cherry Douglas, Luti de'Lisle y Nancy Hernandez** como artista internacional invita. E obranan ta na benta y lo ta den exposicion den lobby principal di Aruba Marriott Resort pa 4 siman consecutivo, **abo** tambe ta invita pa pasa admira y asina sostene tur organizador y artistanan envolvi.